

本朝分省人物考

人物考目錄卷之八十七

河南開封府四

党以平

婁志德

高尚賢

劉 詗

杜 柟

左國璣

楊 汧

高叔嗣

王 教

高 拱

徐自得

劉自強

張 鹵

姚繼可

梁 策

李 濂

高瑾

徐聰

補遺

孫賢

王濬

王潤

劉校

曹嘉

侯于趙

孔貞一

喬登

本朝分省人物考卷之八十七

河南開封府

四

党以平

党以平字守衡號頴東其先自平陽徙禹州公當時母夢白鶴繞庭槐乃孕生四歲始能言六歲授以詩輒了大義弱冠就婚陽曲有異人相遇公署預言名位與壽甚異二十二中河南鄉舉正德甲戌第進士授戶部主事管倉淮安餉事清簡日與諸生講學論文東南高士多從游者時闈宦用事屢干其怒使校日夜蹤跡無所得乃已田某者除夕投金於平與羅

主事英家上書其名翼日集官吏比較呼名至田某  
皆之責付領回其後羅卒被中人始服其有見 武  
宗新收家將朱乾等六百名直入臺基廠取馬草去  
乎禁之責發兵馬司獄提督太監江彬面奏上朱乾  
率數十衆執至豹房彬又奏上 上竟釋之改差浙  
江監兌癸未冬補陝西司員外尋陞浙江司郎中歲  
乙酉京畿大侵死者枕籍於路題發太倉粳米六萬  
石粟米八萬石照原價變賣又令蠟燭幡竿二寺每  
日添米三石作糜食乞人之無名籍者其本處人收  
入順天府養濟院衣食之麥熟停止京師米價頓減

全活甚衆國計亦不失原額大司徒秦公歎曰爾才  
十倍金不能及至今會府庶事遵遺法者甚多吏部  
擬以提學外補秦公留之曰金老矣部事全賴此官  
整理疏上中止冢宰廖公招與相見避嫌不往廖益  
重之擬以四品京堂爲內閣張羅峰所奪補浙江溫  
處兵備副使清節表表貪汙者望風遜去溫處軍素  
驕乃因餉事激變嘯聚教塲中樹旗幟爲亂縛草人  
磔之曰殺某官矣平往諭之曉以恩信衆皆首伏懲  
其魁桀卽日解散倭夷讐殺爲地方患獲海賊五百  
人憲臣欲以爲功喜謂平曰我列公功以聞於朝例

當封侯如信國公故事平訊其爲海中魚樵爲賊所掠悉縱之曰殺無辜以幸賞吾不爲也陞叅政分守兩浙常以政暇訪求鴻儒講學談道爲兩浙名士錄陞廣西按察使未行陞浙江右布政使尋轉左在浙旣久熟知浙東西戶口田賦土宜民情以一省事直任於已雖越職侵人皆所不避人亦不敢尤之甲午文武二舉提調場屋貢舉一一得人程文皆所裁定爲各省冠陞太僕卿未幾轉右副都御史巡撫順永薊州躬視要害起亭障特芻糧謹烽燧條陳戰守勝敗之要考求利害以爲禦戎長久計又內修保甲之

法禁銀礦之利條所部廢敝者百餘事時 世宗巡  
遊天壽山屢過沙河等處周覽工作每每稱善於是  
特旨命協理院事有蔣倫者 興獻皇太后之姪兄  
弟爭爵誣以內亂倫木訥不能辯或欲阿太后意坐  
倫以死訊得其寔立出之他事亦多平友 世宗皇  
帝往往嘉悅兩疏乞休俱荷 溫旨乙亥扈從 聖  
駕南巡往返八千里嘗在左右時賜咨問是年風雷  
之變擊睿皇帝廟王廷議令三品已上自陳平陳辭  
特懇始得致仕歸時年未五十家居三十四年優游  
田里權門要津不通一字太監黃錦爲舊知南行過



訪許以起用比歸再過不復出接語人曰刀鋸之餘  
薦天下豪傑司馬子長之所耻也元稹晚依闈宦而  
得相豈如白居易之爲全節邪内外臺諫前後薦舉  
二十二疏若罔聞知亦有大臣以書勸之起者反貽  
書勸其歸旣而大臣被譴人咸服其高識

婁志德

婁志德字存仁上世唐師德之後居汴之懷慶徙通  
許生而穎異向學十七丁父艱哀毀骨立人以孝名  
二十補邑學生縣尹任廷傑爲舉婚媾逮秋登省薦  
越明年居母憂掩廬授徒非聖學不講丁丑第進士

刺真定之趙州如冰如檠嘗酌水以自堅大司徒孫  
公稱曰古循吏也入覲遂留副戶部郎諸郎署缺悉  
委以攝晉陝西司正郎會北虜寇邊邊儲告匱命往  
甘肅督理出納凡有奇羨輒舍以舒民出守杭州屬  
邑海寧多海患親視之爲築石塘防焉杭災沴錯出  
德禱雨輒雨禱晴輒晴杭民歌之會壬辰入朝僅一  
身一吏囊無片帛諸當道彌益賢之甲午補福建鹽  
運司使行之日裝橐蕭然晉浙藩叅政閩商人思之  
爲建祠勒碑以志廉正御史包蒙泉知德最深凡所  
咨白輒嘉獎行之比復命登武夷指九曲泉謂藩臬

諸公曰此水之清似婁運使矣至浙而民喜其再來  
督徵以時國賦民望兩便之晉右布政使復以臺檄  
劑量賦役釐爲十卷名曰兩浙賦役成規民甚服焉  
癸卯晉福建左布政使至閩閩人以再得福星爲慶  
晉南京太僕卿繼晉太常卿陞山東巡撫越明年丙  
午將發留都忽痰火作遂不起歷仕三十餘年無毀  
節大叅蔣公淦語人曰海內如婁公清望是吾人範  
也有題大梁包公祠壁曰昨日包公今日婁公其爲  
人所歸服如此

高尚賢

高尚賢字大賓新鄭人正德庚午舉鄉試第一丁丑  
登進士授工部主事改禮部遷員外郎會乾清宮災  
尚賢上疏言外戚漸盛宦官漸恣言路漸塞數事語  
皆剴切上嘉納之尋陞山東提學僉事正文體崇  
節義士風爲之一變無何以憂歸服除補陝西僉事  
入爲光祿寺少卿脩供儲錄革累年弊政未幾致仕  
歸卒於家

劉訥

劉訥河南鄆陵人故尚書璟之子正德丁丑進士授  
寧國府推官武廟南幸訥署蕪湖縣事中貴索饋

不得執繫詔獄嘉靖初復原職尋擢御史陞南京通政使司右叅議歷大理寺少卿僉都御史大理卿刑部侍郎南京右都御史工刑二部尚書會任丘王聯告訐獄與株連縉紳四十餘人詎悉覈實以聞聯伏法因蒙譴歸嘉靖三十八年九月卒年七十有七

杜 柵

杜柵字子木臨潁人少穎敏博涉墳典固不契其旨要登正德辛巳進士授戶部主事改兵部遷通政司叅議歷左通政所至咸有聲績擢右僉都御史動合軌則政遵憲典事有所不可爲雖奴隸不爲之欺道

有所不可渝雖三公不爲之移一時朝野咸注望焉  
嘉靖中卒於官柎嘗云文不載道不足傳世詞不古  
雅雖傳弗久故力追風雅左氏先秦之調佻僻險怪  
一洗而空之有研岡集行於世

左國璣

左國璣字舜齊其先江西永新人大父輔正統間爲  
御史以言事謫雲南驛丞擢河南尉氏令因治第汴  
城遂爲大梁人舜齊風骨瑩爽長身玉立幼師其姊  
夫李夢陽李公奇其才挈之京師俾受毛詩於慈谿  
姚鏞舜齊跣弛不羈性嗜酒不汲汲仕進束髮作詩

賦古文出語輒驚人顧不甚攻舉子業年幾四十始  
舉於鄉數試禮部不第嘉靖庚子夏六月飲南郊水  
亭醉歸而病病數日卒時年六十一舜齊襟度灑落  
無城府畦畛平生不藏怒蓄怨故人樂與之交喜讀  
史記文選李杜諸家詩其爲文馳騁踔屬落筆滾滾  
千百言顧所作多不存藁嘗自言曰詩文乃儒者餘  
事奚用藁爲字畫遒勁奇古四方之士得其片紙輒  
藏以爲寶每會試之都下海內豪雋填館修謁公卿  
大夫折節造訪其傾動一時如此

楊 汧

汾字宗源祥符人性孝父母卒悲哀幾絕四族同  
爨內外無間言補郡庠生一時聲稱出諸生上鎮守  
中官劉朗延之爲其從子講業嘗引汾至其私藏令  
恣所欲取之汾一無所取朗大加敬服嘉靖壬午貢  
入太學授安肅縣訓導正身率物遇才雋之士輒改  
容禮之諸生有貧者則出俸金以濟其不及督學陳  
公講稱之曰此真後進者之楷範也乃命總教諸庠  
士熙然向化後遷海陽王教授比卒安肅諸生思之  
請於當道祀之名宦祠云

高叔嗣



高叔嗣字子業祥符人賦資穎異年十六著申請賦  
幾萬言邑長老皆嘆服嘉靖癸未舉進士爲工部營  
繕主事改吏部稽勳歷遷員外郎郎中與薛君采輩  
倡和歌詩人爭傳誦名動海內多忌之者會外戚蔣  
氏乞封叔嗣執不可忤時宰意遂謝病歸築讀書園  
爲終隱計居三年復起前官同舍郎諧之冢宰出爲  
山西左叅政治冀南永和王欲改馬跑泉水環汾州  
城中丞報可叔嗣曰王專其利奈小民生業何卒止  
其議汾人感其惠爭肖像祀之無何改治太原遷湖  
廣按察使歲大旱叔嗣禱於山川中暑卒年才三十

七耳海內名流共惜之叔嗣嘗自號薊門山人爲詩  
文苦心矢力特超玄乘卓然名家其兄仲嗣丙戌進  
士歷官廣西府知府文詞奇古王子衡嘗稱爲大梁  
二俊云

王教

王教字庸之祥符人少與兄天敘並著才名稱中州  
二鳳嘉靖癸未進士及第授翰林院編修與修會典  
庚寅應 詔獻郊祀議無徇詞已復陳時政十二事  
上嘉納之遷侍讀嘗三爲會試考官衡鑒精明爲時  
所稱癸巳充經筵講官歷遷國子監祭酒上薛文清

公從祀議識者趨之會慎簡官僚以教兼右春坊右諭德而祭酒兼春坊寔自教始未幾遷南京兵部右侍郎時闕尚書教署其事議以鹽引羨金辦漕舟料價民甚便之後朝 萬壽節道病趨家遂卒

高拱

高拱字肅卿新鄭人生而狀貌瓌竒學問攻苦義爲文沈雄開爽出人意表年十七魁其鄉嘉靖辛丑成進士改翰林院庶吉士授編修 穆宗爲 裕王出閣講學居外府拱爲講官穆在開道王目屬而心儀之時兩府雜居讒言肆出拱竭力周旋邸中 王深

倚重之考滿陞侍讀戊午典順天試尋陞侍講學士  
在府凡九年陞太常寺卿管國子監祭酒事 王賜  
金繒甚厚哽咽不能別雖去講幄府中事無大小必  
令中使往問手書懷賢二字遣中使賜至第無何又  
書啟發弘多四字賜之壬戌陞禮部左侍郎兼學士  
癸亥陞吏部左侍郎掌詹事府事乙丑主考會試所  
爲程文奇傑縱橫傳誦海內六月陞禮部尚書丙寅  
進兼文淵閣大學士參預機務會 世宗不豫入直  
諸公各移具出時江陵公尚爲學士以公事至語拱  
曰君父病篤臣子移具可乎拱愕然曰吾意乃如此

竟不出會 世宗龍馭上賓議登極賞軍事拱曰祖宗無此自正統元年始也先帝以親藩入繼時尚殷富遂倍之今第如正統事行則四百萬之中可省二百萬矣當事者竟如嘉靖事行而司農苦不支會有言大臣某者其人實有望不當擬去而首揆重違言者意乃以揭請上裁拱曰此端不可開 先帝歷年多通達國體故請上裁 今上卽位甫數日安得遍知羣下賢否而使 上自裁 上或難於裁有所旁寄天下事去矣乃竟請 上裁兩人嫌益開言者爭謂拱擅矣於是胡應嘉歐陽一敬輩論劾不休因

力請去疏十二上得請賜馳驛遣行人護送又賜銀幣以歸越一載詔還內閣兼攝吏部凡晨理閣事午視部事所黜陟取辦倉卒不無紕繆乃集諸司官各授之策曰東部職在知人人不易知也今幸早計之某德某才某不德其不才書諸冊皆親封記之月終以復以故賢否不淆黜陟允當北虜頻年入犯中外以兵事爲憂拱曰大司馬安危所係至重也不得其人由儲之不豫少司馬止二員此無事時可耳閱邊事未免假於他官總督乏人未免移於他處移彼就此支東補西一或告警動卽掣肘請於兵部增侍

郎二員一遇巡閱卽以一人往邊方員缺卽以一人  
往凡邊方險隘虜情緩急將領賢否士馬強弱皆已  
曉暢方略素定遇大司馬員缺卽以補之如此而稱  
乏用必不然也兵部司屬職在軍旅今宜特高其選  
以智謀才力者充之使其專官於此不復他遷如邊  
方兵備卽以司屬往邊方撫臣卽以兵備往邊方總  
督卽以撫臣往而總督與在部侍郎時出時入以候  
尚書之缺邊關總督之臣在邊日久著有成績當令  
回署以休暇之後不妨再出使其精神不疲而知慧  
不竭以勤王事則濟必多已又上疏嚴邊方有司之

選俱得 旨報可時虜甚警朝臣無經戰是人心震  
恐乃以尚書陳希學曹邦輔侍郎王遴各率師背城  
列陣以待而以總督王崇古譚綸專征勦無內顧是  
歲也虜竟不入霜降讞獄故事府部皆在冢宰當執  
筆至是大司寇意拱閣臣不屑往拱曰吏部事皆吾  
事也則集諸司議於朝房凡二十日出寃獄百餘人  
往大計時銓曹祗問藩臬爲黜陟拱多所參伍或衆  
否獨留衆可獨黜其黜者必告以故無不懽服先是  
貴州撫臣白土官安國亨叛逆當勦久而不克拱曰  
安國亨安智夷族自相讐殺何謂叛逆而撫臣以告



國亨懼禍不測且圖苟全有司不原其情激而成變  
卽以爲叛逆之證遂使 朝廷欲開釋而無由國亨  
欲投順而無路於是召職方郎中至授意疏請以科  
臣賈三近往勘復面授以方略乃國亨聞科臣且來  
果喜曰吾生矣吾豈叛逆者哉將漢夷犯人王寬吳  
瓊阿弟輩獻出而母子出就理輸銀四萬一千有奇  
抵罪蓋科臣未至而事已定矣北虜俺答孫把漢那  
吉來降邊報至中朝人心洶洶罔知所措繼報者至  
曰酋婦甚愛其孫而老酋甚懼其婦泣欲得孫耳於  
是請下令獻我叛人趙全等以贖其孫奄酋果以計

招全等全等皆中國人而爲虜用居板升領衆數萬  
往歲破城殺吏皆其爲也 世宗懸重賞購之得其  
一爵通候然竟不可得至是乃以那吉購之又令邊  
臣以緋袍金帶鶴蓋鼓吹送那吉歸而宣諭奄答曰  
那吉是我中國臣若善視之老酋夫婦旣喜得孫而  
又見其榮寵南向取胡帽叩首呼萬歲而封貢之議  
起矣時中朝疑畏盈庭鼎沸動以宋人講和爲辭拱  
曰宋人求和於虜機在虜故曰講今虜求貢於我機  
在我直許之而已彼嘵嘵者豈爲國籌利害哉乃請  
封奄答爲順義王其餘都督指揮千百戶有差而奄

虜吉能等亦請願如例於是上疏請每歲特遣才望大臣四出閱視以今視昔錢穀贏幾何兵馬增幾何器械整幾何其他屯田鹽法以及諸事拓廣幾何果有成績論武功爵若襲故常罪如失機 上嘉納之

一日 穆皇有旨高閣老夜宿乾清官門外拱奏曰禁地非人臣所宜宿願宿闕門 陛下有召可頃刻而至 上可之 御體漸復具疏請 上懲忿寡慾

覽奏甚喜越二日 聖恙復劇宣內閣受顧命司禮監以二札一授 皇太子一授拱蓋遺 詔也拱泣

奏曰受 陛下厚恩誓以死報 神宗登極上言五

事得旨報可以陰謀逐馮保機先洩翌日有旨逐之卽乘騾車去歸杜門謝客口不言時事未幾而有王大臣之獄柄人將借以殺之至次日殺王而拱獲免自後不敢復見一人矣素好讀書作問辨錄十卷春秋正旨一卷邊略五卷綸扉外藁四卷政府書答四卷綸扉集一卷日進直講十卷獻忱集四卷萬曆六年卒於家祭葬止半給又二十餘年值建儲大典嗣子務觀具疏上有旨高某擔當受降北虜稱臣功不可泯贈太師謚文襄廕一子尚寶司丞

徐自得

徐自得杞縣人甲午舉鄉薦聲籍甚一時戊戌偕計  
南宮聞母楊孺人之訃躡踊慟哭瀕絕而甦辛丑成  
進士筮仕行人司行人奉使瀋藩明典禮卻餽遺得  
使事體丙午召入掖垣改兵科給事中時大虜擁衆  
戕殺朶顏福餘三衛諸夷內避乞給衣食耕具乃上  
言朶顏三衛風稱崛彊一旦遭破殘之慘既不敵於  
彼將必窺利於我烏窮則啄獸窮則搏勢固然爾迤  
北諸虜性猶豺狼旣飽而驕饕貪亾厭且朶顏旣破  
撤我藩籬何所顧忌趨起而不內犯哉宜申飭邊備  
繕堡廣偵以觀未萌之釁已而虜酋卑辭求貢實觀

緩我邊防以圖大逞 廟謨將許之廷臣明知其詐而陰闕 上指所嚮觀望莫敢發抗疏言勿許便疏入五日不報同列或爲危之命下則大見采納他日有以吏垣協理請者疏未及也特批曰徐某乃知

上默識其名固將大用之矣旣而陳情終養得請南歸又四載封公卒容瘠骨立人稱死孝至奉繼母田孺人一如奉封公居則游情圖史以開卷自娛視世情焚華脂韋不翅將免如是者數年乙丑詔起諫垣再乞終養不許入朝補工科給事中先是河決曹縣防河使疏請開趙皮寨孫家渡以殺水勢特遣侍郎

吳公鵬都御史魯公鈞董其役上書極陳關繫 祖  
陵周藩至急乃不果開晉尚寶司少卿履任之夕聞  
田孺人訃匍匐歸里襄事後遂堅卧不起矣蓋起家  
三紀立朝蒞官甫四年餘皆優游泉石之日也既歸  
構市隱堂數楹歌誦其中詩尚典鬯不驚纖靡文爾  
雅有則一洗鈎棘雅工詩餘小令少游美成而下不  
多遜也所著有苦中踏埜二藁京華集京華續集大  
游子樂府二冊藏于家

劉自強

劉自強字體乾扶構人嬰年之會城值周藩遜堦用

事者奇其材欲鉤致之輒走匿密室中以免蓋屹然  
有巨人之志焉少明毛詩戴氏禮嘉靖辛卯舉鄉試  
甲辰第進士授廣平府推官陞吏部考功主事歷稽  
勲文選分宜子世蕃以鬻爵干謁峻拒不納蕃深銜  
之會遷太僕寺少卿亾何出補陝西叅議一時輿論  
籍籍不以屑意也遷山西副使甫蒞官悍卒王慶率  
衆以夜畔城中大駭自強知慶有嬖妾選勇士伏旁  
舍待詰旦慶來携孥輒斬其首以殉餘黨瓦解遷陝  
西叅政進按察使時大旱一城亾所得水自強相解  
舍旁當有泉鑿之泉源涌出一郡饒給居人神之名



曰劉公井遷湖廣右布政使轉左歲侵民苦饑出羨  
金大賑之所全活不可勝數甲子遷應天府尹秩滿  
進右副都御史巡撫四川寇黃中負險猾驚奉勅會  
湖湘兵討之屬妖人蔡伯貫乘間嘯聚鹵掠郡縣勢  
張甚自強策曰黃中穴鼠耳直以泥丸封之伯貫出  
柙虎也可急擊勿失輒移師攻貫一鼓殲焉已回兵  
向中中大怖乃所據牛欄坪者險絕其中夜當道垂  
巨索屬鈴百餘勒卒更番守鈴索一動礮石交下人  
無得免者乃斬木百章爲雲梯陽攻之微察山旁側  
有少罅督甲士夜銜枚上鉦鼓并作呼聲震巖谷中

賊黨戰粟莫知所出以爲自天而下也不戰而潰捷  
聞賜文綺白金羊酒勞之丙寅入拜戶部右侍郎總  
督倉場戊辰轉南都察院右都御史進南戶部尚書  
再改兵部叅留務庚午入爲刑部尚書閱歷三部時  
推老誠持大體無出其右者隆慶初元累疏乞骸骨  
歸戊辰卒享年七十有五訃聞賜諭祭命司空治葬  
爲人精敏果毅事事致於理留都素狡猾難治一切  
峻之以法一尚書以事囑怒曰賊吏敢爾耶起奮擊  
仆其隸人都人語云尚書賊與臺僵矯矯劉公洵自  
強至今傳之

張 鹵

張鹵字召和儀封人年二十一舉鄉試數上春官不  
第名日益高嘉靖己未成進士除婺源高平二邑令  
以治行異等徵拜禮科給事中英毅慷慨多大畧持  
論侃侃無所避值 穆宗踐祚疏請勤視朝蒞經筵  
廣顧問以隆新政 上嘉納之時 神宗甫六齡卽  
引累朝立東官故事以請已復上言慎選內臣給事  
東邸宦官孟冲以內旨有所罪極言祖宗家法輔臣  
無不與聞之政法司無不詳讞之刑中旨可邀置廷  
尉何爲庚午晉太常少卿 命未下而內江相請更

兵營制猶草疏極言其不可或勸以已遷官矣願少  
巽鹵曰未拜命猶諫官也疏入竟從議營制皆如故  
辛未遷右通政九月拜南京右僉都御史撫浙江以  
養母棄官歸戊寅 詔守舊秩撫保定已加右副都  
御史鹵自銀臺擢中丞三領節鉞在金陵殲叛卒馬  
應祥在河道獲妖人王後溪在保定修三關險阨數  
百里保障功爲多大璫馮保乞爲建坊不許以爲勞  
百姓力媚士大夫尚不可况內璫乎保目攝之而未  
發也江陵以材望相推每與談膝輒前席旣別與之  
約事可否具以書相聞鹵益自發舒引當否無所詘

有所薦進及論刺皆獨行其意不阿相君旨久之漸不能平嗾言官論之左遷南京太常寺卿乞休歸後江陵敗凡再薦起用竟不果以壽終於家

姚繼可

姚繼可字光父號又軒襄城人父汝臯登正德丁丑進士因諫巡幸議大禮被廷杖有古直臣風繼可生七齡卽知向學嘉靖甲子舉於鄉乙丑成進士初授南陵令俗狡政煩以寬大明敏治之一年而民服一日同官失金呼衙役某前曰金爾盜也不任遂令人持其衣至家索金頃刻而至僚屬問故笑曰吾先見

若所執刀柄有土淖若足踐然已心疑之忽聞失金料必踐此出入也訊之果然遂有神君之號戊辰以治最徵選四川道御史奉命巡按直隸宣大提督學校以興賢育才振綱肅紀爲首務因陳言邊務指斥和戎之陋拂當事意疏雖未行而時論趨之外遷四川僉事分巡重慶等處地號冲煩苗夷雜處至則修器械繕城隍剔蠹除姦驚如播酋且帖然就化丙子陞陝西叅議分守慶陽地當極邊兵食兩詘詰戎蓄糗屹然爲西北保障遂遷本省副使兵備定邊等處邊適當冲擾亟命郡邑衛所修築簡練夙夜靡寧警

塵遂息隨擢山西按察使刑名紀綱日就振飭陞湖廣右布政使攝左轄事尋遷陝西左布政使會計井然毫無點染時關中菑疹頻仍真酋潛掠南畝蹂躪重以套虜多故糧餉徵發無虛日拮据應辦軍民兩利入覲卽拜右副都御史巡撫寧夏恩威並用制馭有方卽唃劉輩逆志罔敢逞時捲酋西牧行經鎮地戒其部衆無輕犯且遣頭目武天祥等來乞貢猶恐虜情叵測疏陳防守事宜悉荷嘉納庚寅以內艱歸禫除以原官起巡撫陝西時寧鎮內躡於唃劉外誑於火酋至屢上西顧一時廷臣咸推轂焉乃以羽

書促就道中道聞督臣被逮逆黨構虜深入掠城堡  
戕運軍絕我糧道遂星馳入關提兵至河州地方以  
精兵遏其鋒死士搗其穴虜遁糧餉始得至靈州數  
萬枵腹卒不至生他虞而逆黨就戮當爲首功及克  
城後疏上善後事宜數千言 上依擬癸巳陞工部  
右侍郎上疏請告不許時大工煩興蒞任卽奉勅提  
督工程兩宮鼎建殫精以管職業甲午再懇恩乞身  
始予告歸戊戌復起前官仍奉勅提督工程踰歲大  
工告成蒙恩嘉賚滿考稱最荷金幣之賜廕一子擢  
工部尚書 水衡缺費悉力計畫委曲助勦精竭神



耗而兩目矇矣屢疏乞休具蒙溫旨勉留疏至四十  
五上歲乙巳始得俞旨賜乘傳歸里歸則杜門謝客  
踰二年而告殂訃聞贈太子少保遣官治葬守臣稱  
制臨祭者四再廕一子爲人真誠踈爽風骨稜稜自  
少至老動止準繩無失尺寸當官守法務在鉏抑彊  
梗惠利小弱居常踈踈簡默及當大議大謀衆莫敢  
發守經據古鑿鑿指畫率以片言取決蓋老成正直  
君子也

梁 策

梁策鄆陵人性至孝七歲母病將不起旦夕焚香泣

中庭請以身代持香謁城隍廟伏地涕泣幾絕一黃  
冠授藥一莖僅寸許曰煎湯服之服卽旋已亦不知  
爲何藥人謂孝感致然時稱孝童就外傳手孝經不  
釋十七齒鄉校二十四登賢書孝聲籍甚行部使者  
往往移檄書物色抗辭逃避三十四中嘉靖乙丑進  
士授工部營繕司主事歷員外郎中居郎署十年三  
請告省親留妻侍養未嘗以隨陞四川成都知府嘆  
曰我不能叱馭如王陽矣抵家蒲伏父前號泣以請  
父大怒曰盡力王事非孝乎爾好孝經不憶始於事  
親終於事君耶猶伏地不起舉杖欲擊方起而戒途

抵成都數月而大計計畢疏請終養時父母年皆七十躬調甘脆未嘗任侍兒一茶一湯必跪進父老而好遊日遊於所知家寒暑不廢每至漏下數十刻秉燭坐待閤人報至趨門迎掖入寢室候寢定而退質明盥沐至寢門問侍婢安否安則喜稍不安卽憂惶廢食人言修虔太和山可致親壽徒步步往十步一下拜千有餘里不知勞二人壽並八十母歿喪毀如禮旣葬日廬墓側暮歸侍父父病脾不能離衽席調飲食跪榻下手舉匕筋以進如此者年餘父歿旣合葬廬墓側至服闋不能去縉紳先生曰如禮制何再拜

泣而徹廬初成進士部送遼左軍餉獨如額遼軍  
懽聲動地主帥盛筵再拜曰近世所僅有也管膳部  
董大工往年錢穀盡中官處分闌出無筭一切禁革  
大忤中官日圖中傷之陰伺無所得改度支郎督維  
揚餉裁革一切冗費揚人感嘆不容口晉郎中大工  
成敘功當陞尚寶以中官中之陞知府親終當補官  
有司具徒御不行直指中丞交章列孝行以聞詔補  
山東登州府時倭夷蹂躪朝鮮登州戒嚴南兵三千戍  
守白督府曰瀕海多健兒與衣廩而日練之皆精兵  
矣彼利得衣廩保室家豈不勝召募耶督府稱善數

月得精兵數千一胥爲妖所愚聞而怒曰何物妖敢  
爾檄城隍治之胥夢妖曰梁孝子驅我我去矣翊日  
無恙居無何陞陝西副使力疏投閑中外歷官十餘  
年俸外毫無染指交際應酬一切取足於家自壯至  
老急於周人人有片長加樂稱羨其拂意者未嘗形  
色辭孝廉仁厚悉根天性鄉人慕德孝不能忘醵錢  
立孝子祠

李 濂

李濂字川父大梁人爲兒時恚而啼以棗栗啖之愈  
啼示之書則止七歲就塾師日可誦千言九歲能爲

詩其語多警人稍長習舉子業卽攻古文詞非秦漢書不讀嘗作理情賦李獻吉自左舜齊所見之輒歎曰班馬之儔乎締爲忘年交年二十五舉河南第一人明年舉進士高等以王府姻不得待宿衛乙亥出守沔陽會丙子丁丑兩歲大祲獨加意撫字民賴以無徒亾暇則開閣與諸生談藝文體翕然丕變其所造士甚多辛巳擢貳寧波其治亦如沔癸未擢山西按察司僉事顓督屯田凡積幣滿除殆盡後攝學政三晉人士駸駸嚮風未幾歸臥河山之陽慕延叔堅之爲人乃闢景延堂朝則肆力六籍手自箋注夕則

詠詩南軒百家衆氏投間而作請文者無虛日所著有嵩洛諸集祥符文獻志汴京遺蹟志勾異記醫史諸傳凡若干卷

高瑾

高瑾大梁人爲人孝弟儉直喜誦書史嘗歲暮出取逋負見多窘乏輒割券馳一空車歸里人望見盡笑之瑾不較也子珣爲東明丞強逆之官邸輒感額求歸曰吾往未嘗入公府乃今公府居耶輒歸舊令得代去問曰我孰與新令賢熟視久之曰君似弗如也人歎服其直鄉閭從化家居子弟見輒趨拜却立里

中人假僮僕使不復關白其主人雞豚放猶一家數里之內淳風藹然妻侯氏亦孝讓有幼子爲嫂子提殺之侯泣謂瑾曰吾幸尚有珣奈何令伯氏無後卒出之獄嫂予以百金詣瑾謝瑾不受詣侯謝侯不受曰吾利而金出汝耶

徐聰

徐聰字聞博郟城人也嘗亭灑上於是稱灑亭先生力行篤學苦節清修以廉孝聞春母病思櫻桃非時無從得泣禱而行彷徨叢薄間得櫻以歸母食之愈人異之稱徐孝子以貢爲醴泉縣學訓導先行後文



制外兼內端士習士氣久之士翻然而革聰乃忻忻  
喜曰吾志其行矣於是構齋植竹峩冠委裾講說周  
孔微緒會乾州學官缺檄聰往攝之久之而乾之徒  
猶其徒也人始知其才醴泉饑錢叅政者出帑金千  
檄聰賑之或問錢奚捨縣而任學也錢曰聰也孝廉  
孝則不忍人廉則不愛金久之使擢其縣事縣以之  
治於是豪人懼歸我侵田無何免去或咎之聰直哂  
曰子謂我兀兀腐夫邪其亭瀝上也年向衰矣猶聚  
徒講說顧益篤卽大寒暑罔輟也晚病目青省延接  
矣至遇經生學士則顧繾綣竟日瀝上至今稱恭儉

鯁直篤行耽學必首聰云

補遺

孫賢

孫賢字舜卿杞縣人景泰甲戌進士第一授修撰預  
修寰宇通志成轉侍講天順初改左中允侍東宮  
講讀憲宗卽位遷太常寺少卿兼侍讀成化庚寅  
預修英宗實錄進太常卿兼侍讀學士上疏請立  
皇太子且引疾乞休示無希覬意章並上上皆允  
之皇子立是爲悼恭太子賢憤憤不樂而卒年五十  
四贈禮部左侍郎兼翰林院學士謚襄敏

王濬

玉濬字文深河南商水縣人天順四年進士由平鄉知縣選江西道御史巡視兩關建言卒于杖下

王潤

王潤字敷仁河南臨潁縣人弘治二年舉人由國子學正選雲南道御史正德元年巡鹽兩浙忤瑾坐免後復原職巡按北直陞陝西副使

劉校

劉校字宗夏開封府鄆城人正德丁丑進士授刑部主事迎其父就養至定州卒校聞跣奔抱尸慟絕已

而少蘇視面目有塵垢跪以舌舐而拭之服闋復任  
值 武廟南狩校諫止 上怒罰跪五日杖四十尋  
卒嘉靖初元追贈尚書 卿錄其子入冑監

曹 嘉

曹嘉字仲禮河南扶溝人正德丁丑進士由庶吉  
士授浙江道御史建言謫大明府推官嘉靖元年  
起補原職復謫禹城知縣尋降茂州判官後復御史  
指摘宮闈 上命賜死復昇樞以諫十二年陞山西  
提學副使累陞江西右布政致仕

族于趙

侯于趙字宗度開封府杞縣人嘉靖乙丑進士授平陽府推官清介執法不避貴勢陞戶曹尋改兵科給事前後疏奏數十上皆有裨時政戚畹武清伯一日請營菟裘費三萬金上以 太后故允其請抗疏極言其不可舉朝危之自亦懼禍不測乃與家人決別待罪闕下賴 上英明袖其疏不使 太后知得以無恙於是中外咸誦爲直臣而權倖舉目攝之矣尋以開泃河議與江陵相左出爲江西大參遷左右轄擢拜都御史巡撫山西時北虜順義王俺荅物故部落內闕慮有意外變乃多方宣諭陰制黃台吉把

都捨力克等不使跳梁又以恩威宣諭卜失兔等而勤爲練兵儲糧之計其所以陰杜潛消者卽共事之人不能窺其深也未幾以母憂去家居十四年累薦不出卒年六十有三

孔貞一

孔貞一號紹虞杞縣人萬曆己丑進士授湖廣江陵知縣邑最衝疲歲受江水之害蒞任後相方築堤爲本邑無窮之利過客往來設立常規應付能無悞驛遍亦不困江陵前後多循良此其卓然者在任八年行取福建道壬寅巡青癸卯巡漕乙巳巡按四川丁

冰。按真定掌河南道印管外察一時去留從中多  
所幹旋臺中論列悉關 國家大計本年丁憂癸丑  
補江西道管京畿道乙卯陞大理寺左寺丞未幾卒

喬登

喬登字子高延津人吏員敢死有義氣嘉靖癸丑倭  
初至登任平湖典史奉檄禦之倭勢洶湧人退且却  
奮身不顧遂歿于陣士民憐惜之

人物考目錄卷之八十八

河南歸德府

韓政

梅思祖

楊睿

梅殷

楊敬

樊鎮

李從義

徐永達

張景

張昇

皇甫仲和

軒輓

朱謙

附子永

潘禮

李孟暘

蔡天祐



陳聞詩

沈瀚

朱洪

朱纁

沈鯉

本朝京省人物考卷之八十八

河南歸德府

韓政

韓政睢人元季爲義兵長 上定江左來歸授江淮  
行省平章政事李濟據濠爲僞吳守 上命善長書  
招濟不報 上曰濠吾鄉濟爲僞吳守是吾有國無  
家可乎命政率指揮顧時等以雲梯礮石四面攻濟  
濟出降留時守濠召政攻安豐以兵扼四門攻不下  
潛穴城東龍尾壩二十餘丈城遂破克安豐至穎獲  
糧艘歸淮東西悉平從平浙右北伐中原分兵扼黃

河斷山東援兵取益都改山東行省平章政事大將軍取元都檄政會東昌鎮撫臨清元都定又令政分兵守廣平林慮西北二十里元右丞相庸等據蟻尖寨剽剌旁近以給軍食大將軍收諸山寨蟻尖寨恃險未下政進攻庸降調征陝西還兵守禦河北洪武二年封東平侯食祿千五百石與世券移鎮山東未幾復征河北招撫流移出居庸搗應昌取和林深入土刺進至渾河大獲而還出巡河南再巡陝西練兵臨清十一年卒贈鄆國公子英散騎舍人

梅思祖

梅思祖夏邑人初爲張士誠中書省左丞守淮安歲  
丙午大將軍徐達旣下高郵進兵攻淮安思祖封府  
庫甲兵率衆來歸 上嘉之授大都督府副使是年  
八月從達伐吳取浙西降僞吳將呂珍得兵數萬下  
湖州進圍蘇州吳元年九月城破士誠被執師還特  
降褒諭擢浙江行中書省右丞十月從征中原克山  
東沂州等郡洪武元年取大梁破陝州下潼關七月  
旋師徇取河北衛輝等郡未幾檄赴北平取未下州  
郡遂征山西二年晉冀悉平復從征陝西取奉元鳳  
翔平涼鞏昌四郡八月於邠州獲故元叅政毛貴等

三十人送大將軍斬之十二月中原平賜思祖白金十斤文幣十五襲三年擊走王保保軍於定西還自秦州破畧陽入思州取興元是年論功封汝南侯四年伐蜀五年征甘肅還命巡視山東陝西遼東諸處城池十四年四川散毛諸洞長官作亂命思祖爲征南副將軍同江夏侯周德興率兵討之諸洞夷悉平十五年復同傅友德克平雲南置貴州都指揮使司以思祖署都指揮使上以雲南初平欲使重臣鎮之又命思祖署雲南布政使司事思祖善撫輯民夷安之十月丁丑思祖薨賜葬鍾山之陰子義武德衛

指揮陞遼東都指揮使

楊睿

楊睿柘城人洪武初舉進士累遷平陽知府廉介公平處事詳敏不數月政教大行刑清訟簡民稱其賢嘗歲旱睿禱之甘雨隨注後致仕歸吏民遮道泣留歿祀於鄉賢祠

梅殷

梅殷河南夏邑人汝南侯思祖兄子也尚高后長女寧國公主有謀能騎射天性恭忠最爲太祖愛幸受密命輔建文君以誓劍一遺詔一付之旣守淮

安悉心防禦 燕王來假道以進昏爲名殷拒之曰

皇考有遺詔 王怒遽更書言朝廷信奸我欲清君

側之惡耳殷割使人耳鼻授以荅詞曰留汝口與殿

下言君父恩義不可忘 王不得道乃渡泗水破肝

胎出六合革命日殷聞變大慟欲死已執見 文皇

曰駙馬勞苦對曰勞而無功 文皇恨之二年冬陳

瑛言殷招藏亡命匿胡人有私謀又嘗詛呪明年殷

仇家都督譚深指揮趙曦令人擠殷死箕橋下曦言

殷自投水死都督許成懷不平發其實 文皇怒罪

兩人兩人曰 上命也益怒立命力士持金瓜落兩

人齒斬之謚殷榮定公公主牽 上衣大哭問駙馬  
安在 上咲曰爲公主蹤跡賊無自苦謹護一子于  
是以其子順昌爲中府都督景福旗手衛僉事孫純  
舉進士爲中都副留守

楊敬

楊敬歸德衛人父昱洪武間死於陣時敬纔十歲聞  
訃哭踊每思求父遺骸不果乃取衣冠葬于先營之  
次事母艾氏溫清以時服食有節凡母意所向無敢  
少違暇則讀經史開家塾以授生徒每閱戰陣事輒  
流涕不已時人以王哀擬之後母卒敬哀毀踰禮方



殞在堂而西隣不戒於火將及樞敬仰天大哭俄風  
反火息卿里思之事聞 詔旌其門子愨舉人任至  
知州

樊鎮

樊鎮考城人賦性剛直博通經史洪武中登進士第  
授監察御史振揚風紀有能聲歷任山西副使浙江  
叅政山西右布政使所至廉幹勤敏時論稱之

李從義

李從義字守信歸德人洪武戊辰以人材舉上疏言  
黃河泛溢決鳳池口永夏蕭縣皆罹其患乞以軍民

於農隙時塞之 朝廷從其議水患遂除民得安居  
既而試事有能授監察御史執法不撓久之出知晉  
州爲政得民心引年致政終於家

徐永達

徐永達字志道歸德人洪武中由太學生授侯官縣  
教諭永樂間召拜翰林編修侍 皇太孫讀書後陞  
右春坊右中允宣德初陞鴻臚寺少卿復陞本寺卿  
時交趾酋長陳暲死其臣黎利謀叛南徼騷然 上  
遣永達如其國永達諭以順逆曉以禍福利稽首稱  
罪貢獻於廷行有厚餽却之勿受 上深嘉悅燕勞

甚厚已而陞湖廣按察使丁內艱服闋復除山西蒞  
官清正軍民畏服永達在任日止蔬食兩冷妻在故  
里紡績以供其衣食時巡按御史顏繼非法用刑永  
達奏而降之都御史陳智大怒使後巡按密察永達  
之過久之無過可舉智又怒巡按者欲黜之於是巡  
按多方誣訐朝廷宥而不問智大慙永達之名益振  
後以疾卒少卿于謙往吊見其官舍蕭然解束帶金  
賻之

張 景

張景歸德永城人儀狀豐偉篤實和易表裏不二旣

寇時 仁廟爲世子奉命宿衛靖難師出仗劍以從  
東取大寧還戰鄭村琪連大捷以功超授義勇中衛  
指揮同知遂援薊州敗遼東軍之攻薊州者追奔至  
榆口而還自是侍衛守北京南軍圍城日暮效力永  
樂二年以功陞本衛指揮使三年調金吾右衛五年  
調錦衣衛十四年調府軍右衛二十二年陞中軍都  
督府左都督是歲冬封彭城伯食祿一千五百石子  
孫世襲明年侍衛 宣廟謁 孝陵歸奉命總督操  
練右哨軍馬正統元年患痺疾 上遣太醫院官督  
醫視療竟以不起春秋六十有五平居孝於父母友

愛諸弟祗事四聖小心恭恪以勲以戚爵位累加禮  
遇極隆錫賚甚厚執謙秉和居靜守約循禮奉法深  
戒滿盈家庭中外以清以肅其薨也訃聞特遣中官  
監視喪事命禮部賜祭工部賜賻管葬

張昇

張昇字叔暉永城人初以城守功授義勇衛千戶永  
樂三年陞羽林前衛指揮僉事調府軍衛七年授誥  
封昭勇將軍十二年隨駕北征二十二年陞後軍都  
督同知洪熙元年陞左都督宣德元年 宣宗征  
定州三年巡邊俱命分守北京四年 上優禮至

命輟左府事朔望奉朝請凡朝廷有大政事亦得預  
議正統五年封惠安伯歲祿一千一百石賜誥券子  
孫世襲六年正月以疾卒壽六十有三訃聞遣官諭  
祭勅有司賻葬 太皇太后遣官致祭爲人端重孝  
友之德夙著於家閨門整肅教諸子有方平居簡默  
臨事卓有定見歷事四朝公勤忠謹未嘗有過 宣  
廟爲皇太孫時往來兩京及隨侍 文皇帝北征皆  
命以保衛出入起居深有規益其居顯官恒自謙抑  
每陞拜祗畏如不勝其臨政事必咨詢同官審擇而  
行不恃已長遇文學士必加禮敬服食儉素絕無富

貴態而急於利人常施藥石以療人疾爲糜粥以濟  
饑者少留心載籍至老不倦見古忠臣孝子端人正  
士每遇事輒以訓諸子故子孫世守其家法云

皇甫仲和

皇甫仲和睢州人精天文推步之學 文皇北征袁  
忠徹以相仲和以占從一日師至漠北不見一虜  
上意欲還師召仲和占之曰今日未申間虜至自東  
南勝負如何曰王師始却終必勝召忠徹問之皆如  
仲和之言 上怒以朋比黨欺命械之虜不至皆賜  
死隨令內監雜噉之日中不至

占對如初

頃之奔告曰虜大至矣時初得安南神鎗虜一人直前卽以神鎗衝之二虜直前復以神鎗中之虜按兵不動頃之虜衆齊發上登高望之召總兵譚廣曰東西不可却乎廣率精兵舞牌斫其馬足虜稍却已而疾風揚沙兩不相見虜引去詔欲引還二人曰不可明日虜必來降明日虜果詣軍門納款曰不知乘輿在是賜以幣帛乃還正統十四年仲和老矣大學士曹鼐與隣時有旨親征鼐急歸召仲和與議曰胡王兩尚書率百官諫可止乎仲和曰不能止也紫微垣諸星皆動矣曰事將若何仲和曰以老夫計之當



先治內而後行曰已有旨謀監國仲和曰不如立儲君而後行曰東駕幼且未易立也仲和曰恐終不免於立土木之難虜騎逼城下城中皆哭仲和登高望謂家人曰雲頭不向南乎曰然曰大將氣至虜將退矣明日楊洪自大同將兵入援虜遂遁仲和一日出朝有衛士見之曰願爲我相之仲和不肯固請之仲和曰若不能正內何相爲衛士怒曰何以知吾不能正內也曰汝不有妻妾乎曰然曰二人在家正相關不解衛士不信至其家果然後人問仲和何以知之終不言所以堂上官固問之乃曰彼問時見屋上兩

鵲正相鬪是以知之其術如此

軒輓

軒輓字惟行鹿邑縣人永樂甲辰進士天性廉介初爲進士往淮上催糧時冬寒舟行忽落水救出衣盡濕得一棉被裹之不能出有司急爲製衣一襲却不受直待舊衣乾著之後爲御史獨振水蘖之聲用當道薦爲浙江按察使前使林實在任一切供給取諸民輓皆罷之俸資之外一毫不取自著一青布袍寒暑無間破則補之蔬食不厭午則燒餅一枚而已與寮屬約三日以廩易肉一斤人不能堪或故舊公幹

經會晤者留供一飯至厚者殺一雞僚屬見驚異此舉不易得也自餘盤肉一味而已忽聞親喪明日就行雖僚屬尚有未知者景泰元年陞右副都御史鎮守浙江會福建賊吳金八等流劫青田等處奏遣布政孫原貞僉事鄺彥舉兵勦之尋以憂去五年起服陞南院左副都御史掌院事兼督糧儲清操愈勵張都御史純素侈縱設席會諸僚獨不赴旣而以卓食饋之亦不納天順元年大學士李文達薦爲刑部尚書勁節挺然一無所撓以太監曹吉祥忠國公石亨等怙權侵官疏告不許會吏部覆奏始賜休致 陞

辭召問輓歷陳爲御史爲按察使爲都御史 上曰  
昔浙江廉使考滿歸家行具僅二竹籠是汝乎輓頓  
首又問年未老再可用乎輓頓首以疾告 上知不  
可強乃賜織金綵段白金輓辭卽日就道後四年起  
左都御史總理南京糧儲前後所上疏草甚多俱關  
軍國大計旣而以疾乞致仕方章上不報携一吏兼  
程徑歸至家之日卽命取浴具浴畢數問日早暮或  
云午矣遂卒賜祭葬如例

朱謙

附子永

朱謙夏邑人父真靖難功授世留守指揮僉事謙嗣

官累征迤北功陞萬全都指揮使充右叅將分守宣  
府功陞都督充鎮朔將軍總兵宣府 裕陵北狩過  
宣府率其子永出謁頓首哭獻犒軍勞虜金帛累出  
兵截虜有功景泰元年虜入石峯口又入龍門關謙  
與虜數戰斬首中律封撫寧伯卒永嗣伯爵與世劄  
天順初永陳父宣府謁 上事贈侯因稍進用永永  
慎重不洩法令嚴整四年虜入宣府永出禦虜退班  
師六年總兵三千管八年兼總神機營時定襄伯郭  
登出鎮甘肅永薦留登同事充總兵兼領三千管成  
化二年充靖虜將軍征荆襄有功未幾虜酋加思蘭

入大同塞充平胡將軍禦虜虜退與世伯尋充平虜將軍出榆林禦虜有功卽軍中封侯總制陝西三邊與世券七年虜入柳樹泖永出奇邀戰有功十二年召還加太子太保十四年建州夷結朶顏入遼東塞明年永出塞破其營加太子太傅進封保國公十六年出延綏禦虜十七年大同禦虜因戰海東山有功賜券世公十九年虜大入塞充鎮朔將軍總制宣大二路二十三年孝宗卽位召還加太師掌後府總團營如故九年卒追封宣平王謚武襄

潘禮

潘禮字嘉會歸德衛人天順中舉進士授戶科給事

中剛直敢言中外震懼累遷工部左侍郎奉勅理

易州廠故有園圃果蔬之利爲守者所侵漁歲時饋遺中貴人禮取直以需國用絕饋中貴人疾之禮恐禍及已乃累疏乞休許之歸篋惟敝衣數襲圖籍數卷而已巡撫都御史韓邦問以禮清節純行疏於朝乞優禮之武廟命有司月給米三石特加慰問年

八十四卒禮治薪於易州清潔自矢賄門以塞歲省民資累千暨歸里則草舍飯蔬意恬如也歸德有河患禮因鄉居盜夜掠之有粟數升一敝裘爾盜驚嘆

叩頭曰使在官皆若公我輩安敢亂禮謂之曰有酒  
在可飲乎盜諾羣飲而去緣是復居城中在城常徒  
步出城乃御車其敦朴如此

李孟暘

李孟暘字時雍號南崗睢州人天順壬午中河南鄉  
試游大學會司成邢公讓被謫率同列上書力辯義  
聲振於一時成化壬辰登進士十年授戶科給事中  
十四年丁憂十七年補前職癸卯盤糧大同值虜寇  
入邊危甚歸陳邊備十事內陳民壯事著爲令甲辰  
使占城初占城爲安南所侵其王爲安南所害朝



廷遣使封王之弟齊亞麻其臣提婆苦者攘所封印復遣孟暘封王之次弟古來比行上言占城險僻安南之構未靖而提婆苦又嘗竊據萬一弗順損中國威宜縱其來使傳命古來仍勅安南悔過 上悉從之乙巳遥擢本科都給事中留廣中數年卒致古來厓州而定其封弘治戊申始歸陳地方五事曰懲舊弊以修軍政設兵備以鎮邊方開衙門以散嘯聚修城垣以禦寇患通朝報以廣德意多見採納尋擢湖廣左叅政常德歲歉民饑分守其地戢盜賊抑豪橫通米商禁藩府之苛革里書之弊用蘇其民庚戌進

廣西左布政使屬夷獠爲訐而廩食多匱衆口噤然  
亟遣官糴諸遠方軍餉以給乙卯遷右副都御史提  
督南京糧儲奏修官廨以便分理聽支勲臣祿米以  
省轉輸戊午轉南京戶部右侍郎改北庚申轉左壬  
戌晉拜南京工部尚書中官以宮殿傾圮欲修之孟  
暘徐曰萬世不拔之基已有定所修此何爲議乃塞  
南畿織造多取資葦課歲久爲勢家所侵乃清查之  
於是課增用足而民不擾言者又以災傷欲併葦課  
而國用不足則將加派於民是損本實而益浮蠹也  
卒尼之雖掇怨不惜正德丙寅乞致其事疏三上而

後獲允錫誥給驛月廩歲隸 恩數甚優自後權奸  
用事士夫保全者鮮人賢其知幾已巳卒享年七十  
有八所著有南崗吟稿三卷奏議一卷睢州誌一卷  
存於家

蔡天祐

蔡天祐字成之別號石崗其先碭山人元季避兵徙  
睢陽遂占籍焉幼岐嶷聰敏過人弘治戊午舉於鄉  
乙丑舉進士選授庶吉士改吏科給事中寔諤自持  
封駁無避忤權貴出爲閩臬僉事會江西盜起聞于  
朝以閩兵協勦往平之在閩多風力嘗董內府供應

綾紗紙盡革宿弊權豪歛跡省價數千緡部使薦之  
未幾轉山東叅政尋改憲副守遼陽按部所至弊絕  
風清值歲歉多方節縮活饑民萬餘又闢海道圩田  
數萬頃民真其業名曰蔡公田濟南龍山有惡少哨  
聚爲亂勢甚洶洶分兵勦之擣其穴淄川盜起劫掠  
鄉邑捕獲其魁坐以法餘黨悉散再改陝右遷山西  
按察使提點刑獄一道肅清居無何雲中五堡軍亂  
殺撫臣事聞進右僉都御史卽日就道至則與朱總  
兵振誓曰弭此變非奮不顧身不可乃集亂軍諭以  
朝廷恩威衆始奮會桂總兵永密率家衆誅亂者十

餘人衆攻圍其家幾爲所害冒白刃救之得解廉其  
首惡四人正諸法餘孽度不自容夜焚朱總兵宅天  
佑下令懸賞示之火遂撲滅人心少定值督餉主事  
至羣心自危復起亂 上震怒命胡侍郎帥兵討之  
衆赴天佑前泣求救乃示以早圖自獻或可逭誅衆  
皆響應獻元惡十餘人傳首以示脅從者宥之帖然  
無復反側天佑遂請班師 詔下凱旋人心益安  
上優詔答之進右副都御史有彩幣白金之賜旋進  
兵部左侍郎行日民爲罷市哭聲震野且送且留者  
三百餘里已而爲權倖所忌以事中之懇求退避疏

三上乃俞閉門以詩酒自娛教授生徒課子力學而憂國之心未嘗少忘誣亦自白再起至中途以疾辭荷 溫旨許暫回調理明年不起卒於石崗書屋之東軒

陳聞詩

陳聞詩字庭訓柘城人性純篤舉嘉靖丁酉鄉試以親老未仕及親沒哀毀骨立人以孝稱之癸丑秋劇賊師尚詔倡亂被執欲屈之不從乃自絕飲食誓以必死至三日得間自經焉事聞旌其門贈鳳陽府同知仍爲立祠與檢校董綸並祀

沈瀚

沈瀚歸德人舉進士授西安府推官有悍僧樂妓恃藩府殺人瀚寘於法一郡凜然歷禮部主事員外郎出知建寧府以誠信養士愛民考上下當遷時逆瑾索賄瀚耻之遂致仕以歸

朱洪

朱洪歸德人登進士知唐縣治豪族除黠吏人心快之選諸生才者授以經義後多掇巍科以卓績召拜監察御史出按浙江綽有風裁還朝以疾卒于家

宋 纁

宋纁河南商丘人嘉靖己未進士歷南戶部侍郎轉戶部尚書萬曆十八年改吏部尚書是時銓部之權久歸內閣纁夙持風節入銓以來亦思矯矯自見惜不及竟其施云

沈鯉

沈鯉號龍江河南歸德人嘉靖乙丑進士改庶吉士授檢討轉中允壬午典試應天尋陞春坊掌院萬曆二十九年以禮部尚書召入東閣大學士尋加少保文華殿大學士生平素甘清苦斤斤重名行守法度入內閣議論與四明相左未幾同時去位里居多年



杜門養重好周貧恤寡爲德于鄉外事一無所與惜  
不能盡竟所施云